

摛藻堂四庫全書薈要

集部

欽定四庫全書叢要

集部

御選明詩卷十九

詳校官原任主事臣李斯咏



欽定四庫全書
薈要卷一萬八千五百九

集部

御選明詩卷九

樂府歌行六

康海

邯鄲美人歌

蘭氏小姪名鳳笙
邯鄲美人獨擅名
等閒一見萬金賤
何況逍遙翡翠屏
精神婉孌性情適
自恨生身楊柳陌
陌上羞看冶遊郎
鏡中愁作當眉碧
學得秦箏不肯彈

却將針指湊齊紈鴛鴦刺就腸先斷掩却銀牀獨自歎

有所思

有所思兮乃在天一方徘徊不可見反復令心傷秋雨
霏霏庭院空思逢君兮君莫逢流蘇羅帶那復展墻下

梧桐生悲風

王九思

南山操

并序

渼陂子既老棲于南山之阿作南山之操五首月

夜獨坐被之絲桐抒情素焉

我棲兮南山有佩其蘭兮有芝可餐綺皓逝矣誰與我
兮盤桓

南山之陬兮我憇我遊桂樹叢生兮其葉颼颼王孫歸
來兮與爾淹留

倚桂樹兮浩歌有樵夫兮雲中過招我采苓兮山之阿
山之阿兮采苓上有怪松兮偃蹇而蟠屈蒼虬之形安
得駕此蒼虬兮橫四海兮觀八溟

山靄靄兮出雲風蕭蕭兮涼發時雨降兮霏霏芳草茁
兮勃勃恍須臾兮明晦見斗柄兮夕揭蕩吾神兮天游
足不履兮散髮濯澗水兮泠泠弄團團兮明月忽浩浩
兮長嘯舞潛蛟兮幽窟

水有蛟兮山有虎我與遊兮不我有怒山有魑魅兮噭
人與我遊兮不嘯以嚙嗟嗟南山兮既幽既好繫我白
駒兮棲吾身以終老

秋泉歌

山人好弄秋泉月白髮垂肩脚不襪高眠悠悠枕碧石
長嘯時時繞清樾芝山李生揮彩筆畫出秋泉影突兀
泉影盈盈月在天山人坐弄年復年為我一賦秋泉篇

王廷相

楊花篇

廣陵三月可憐春青青楊柳蘸湖新長條不綰思歸客
散作飛花愁殺人浣紗艷艷吳江女拾取香毬連袂舉
花點輕狂只欲飛徒使多情亂心緒吳宮隋苑煙裊裊

別有豪華競春早飛璫流雪灑行旌日暮迷却長楊道
江頭一樹白離離打陣隨風趁落暉漫天撲地何時住
困入滄波却怨誰

宣州歌

河瀝溪頭伐鼓行五湖渡口棹歌聲怪來畫舸如飛去
一百八灘春水生

強半峰巒帶碧流行人猶說古宣州雙懸日月青蓮賦

獨占江山謝朓樓

柳枝詞

休種江頭柳長條空自妍春來郎別妾不繫木蘭船

同聲歌

花艷芳春林淑氣流中堂翩翩引上賓蘭芷獻椒漿趙女揮五絃托意陌上桑非君一回首誰說慢聲長

遊獵篇

列騎晨出城日照紫羅巾翩翩鬪趨捷翻身射行雲野鼓何填填澤火入層旻右馳羽林郎左旋龍武軍不知

中軍誰袍花紫錦麟細馬駛妖姝行厨羅天珍鼓吹振
莽蒼帳幙蔽驚塵策騎出平原呼鷺過重津飛捎鶴鵠
陣奔殪熊麋羣中黃報舉積羽角車雲屯仰茲皇圖昌
遊樂良及辰鳴橈載路轉清歌翻聲新入門選勝客夜
宴金堂春

雙燕篇

雙燕雙飛尾涎涎入閣穿簾每相見誰家繡幙黃金牀
對此躊躇空斷腸春秋月一回改別去人間復相待

遙天遠海不作難年年社日捲簾看蕩子出門如汎梗
憔悴孤鸞鏡中影

巴人竹枝歌四首

江草江花滿眼新不知郎處幾多春愁來欲上東峰望
上到東峰愁殺人

郎在荆門妾在家年年江上望歸查茶蘆種得高如妾
縱有春風枉却花

野鵝唼唼一雙飛飛到儂池不肯歸莫共鴛鴦鬪毛羽

鴛鴦情性世間稀

蒲子花開蓮葉齊聞郎船已過巴酉郎看明月似儂意
到處隨郎郎不知

閨中歌

天閣浮煙迴沙平落照低春江同在眼只覺異巴酉

江南曲二首

采蘅金陵江往來石城道不問江南人安識江南草
江上楊柳花裊裊不肯住隨燕入簾櫳因風復飛去

芳樹

芳樹不自惜與藤相繚繫歲久藤枝繁見藤不見樹

春草謠

塘上草離離照妾春羅衣待君君不來滿庭螢火飛

宮怨

夜輦昭陽月春筵上苑花不成供奉日枉自學琵琶

漢上歌

宜城出美醞載入習家池山公去已久醉殺襄陽兒

朱應登

社燕吟

不忍輕飛去低迴繞井欄情知歸計決祇為別巢難

顧璘

登高丘而望遠海

登高而望遠不見天地端日月互上下東西如跳丸長
風自何起瀛海翻波瀾六鼈正抃舞五岳無時安恍惚
青天中仙人跨飛鸞邀我謁帝室金門鬱盤桓青龍對

人怒玉女傾笑歡彷徨返故路北斗方闌千坐地仰天
歎三日不能餐

獨漉篇

獨漉獨漉水多泥滑泥滑道阻傷我車轂持膏作燭將
以照夜虛花掩光不逮盤下猛虎在山百獸畏威陷穿
三日垂首訴飢鐵生礦中入冶為器劍負威神鎌則委
地男兒生身萬事綱紀突梯無施不如女子

塞下曲

千里驛駒丈八矛男兒畫地取封侯黃昏塞上傳烽火

一夜吹笳坐戍樓

古壯士歌

山西壯士何才雄虬鬚燕領生英風青春挾槊三邊外
白晝探丸九市中一身列侍麒麟殿跨出龍駒萬人羨
狐腋朝裁趙客裘鶼膏夜淬吳王劍生年十五事橫行
肯學操觚記姓名當衢賈勇萬乘避臨危重義一身輕
田文雞狗真餘子有足不曳春申履眼前國士稍傾心

慷慨橋陰為君起

長相思曲

長相思在何處吳岫雲深隔江樹江樹臨春花正榮人
今已向天涯去璣樓繡戶橫蘭煙中有綠鬟金骨仙星
河隱約秋期杳坐捲珠簾望月圓

懊惱曲效齊梁體四首

小時聞長沙說在天盡處人言見郎船已過長沙去
家雞各有壠海燕各有窠郎家撲天屋作底愛風波

玉刻蓮花瑩碧酒湛若空與郎雙杯送出門耐霜風
春風上燕京秋風下湘渚黃鵠有六翮定自不及汝

王韋

柳枝詞二首

却笑梁園事已非梁王去後燕空歸可憐園上多情樹
風絮紛紛學雪飛

渭水西來萬里遙行人歸去水迢迢垂楊不繫離情住
只送飛花過渭橋

左國璣

清夜吟

清夜沉沉漏將換東方月高銀河淡美人調箏促金雁
清歌一曲行雲斷四座賓客不肯散時時顧影流清盼
主人更催著舞衣纈逾花亂銀燭輝腰支拂地鸞孤飛
鐘殘漏盡未忍歸問言乃知竇氏女昔日掌中今是非

寒夜吟贈吳江主人

昏鐘夜定華月高霜氣入室風蕭颼主人下簾執明燭

玉壺瀉出香葡萄
冰河赤鯉價重萬洞庭
黃柑初破苞
解我吳鉤佩
著我赤霜袍
當杯更發鷓鴣調
意氣落魄
無辭勞白日
營營苦多務
喫飯梳頭日
云暮不來清夜
與爾遭枉使
黃金滿箱庫
當年平樂宴賓客
十千五千
更不顧如花少女
勸酒歌醉沒西山
月華素
吳江主人
逸興清寒夜
好客歡相迎
紅爐煖炙薰
談重不怕河水

凍玉成

孫一元

白苧詞

江上睡鴨煙草肥
江南白苧催換衣
雨聲四月不知暑
過盡櫻桃人未歸

自君之出矣

自君之出矣
冷暖何所依
不能見君面
但見篋中衣

楊白花

簾幕閉重重
六宮春已暮
金梭萬丈絲
不挽楊花住

古別離

有酒復有酒餞子河梁路離情不可整風亂道傍樹

吳女詞

開簾日晷歌剪花金刀冷脉脉情轉深誰牽轆轤綆
當窗織錦字拋梭聲咿啞阿弟不肯閒折我牽牛花
燕尾剪空寒花苞纔小吐吟成春恨詞隔窗教鸚鵡

春江曲

家在銀塘住微茫隔煙霧春水新生偶沒篙鴨嘴岸崩
人不渡問船盡日澹無歸擁衣夜宿青汀露

採蓮曲

越女顏如玉和歌行晚風舉頭乍相識棹入蓮葉中
蓮葉翻亂紅正在若耶曲願見隔溪上對坐鬪眉綠

鄭善夫

竹枝詞二首

西澗西邊東澗東千山不斷萬山通謝豹見春啼出血
王孫上樹捷如風

梨嶺遙於楓嶺遙小關高比大關高傭夫過嶺如平地

一歲來迴一百遭

短歌行

驅馬出郭門
馬疾不俟鞭
長跪叩君馬
聽我歌一言
涼風戒芳樹
白露棲寒蟬
君子有所思
遠遊及幽燕
在家人所愛
去家人所憐
朝餐不及餐
豈得戀膝前
下有黃口兒
上有蒼浪天
今時方清廉
盡室難遠遷
獨行多辛苦
告加餐以延年

子夜變歌

我欲渡螺江螺女不可遇人知子夜來不知子夜去

櫂歌

青螺江頭遊子吟黃金臺上秋雲深風塵一別一萬里
美人駕車傷我心

景暘

噪鵠行

鵠鵠復鵠鵠春明飛向深樹落樹邊人家懷抱惡去年
征夫從衛霍邊頭烽火接回中羽書畫警清夜同一自

將軍度河曲天山萬里風雲空邊頭戰血赤河水戰士
磨刀寒落指天子深坐甘泉宮回頭北顧常拊髀樹頭
鶻噪如有知朝來嬉子簷前垂夫君封侯應有期鳳奩
鸞鏡當窗移

韓邦靖

採蓮曲

江南七月蓮花開江上女兒採蓮來桃頰雙垂映秋水
菱歌一曲望春臺春臺一望隔千山征客秦關更楚關

妾意如舟元不定郎行似水何時還若耶溪雲門島江
水何茫茫江風何浩浩暮雨朝雲江上樓春蘭秋蕙江
邊草遠樹千重屬目頻歸帆一片憂心擣一片歸帆望
不來誰家簫鼓畫船開還看柁底鴛鴦宿又見牆頭鴻
雁回一溪還一曲採蓮採未足水清石磊磊採蓮意已
急越女長歌不肯休吳姬輶棹猶相待去年儂採蓮今
年蓮復採年年江上花朵鮮歲歲花中苦心在中有苦
心君不知請君但看並頭枝可憐片片同心蕊但作悠

悠蘿內絲官道採桑勞妾身西湖採蓮傷妾神雲窗織
罷愁長日煙嶼歌殘望遠人遠人不可見且唱採蓮歌
桂楫蘭橈下極浦青樓朱箔此山阿芙蓉苑外金鞍度
楊柳隄邊玉騎過紅塵駐馬非無意白露沾裳將奈何
將奈何採蓮歸明月前溪一鏡飛珠翠綺羅紛照耀吳
謳越吹相因依明年倘若蓮花發蕩子關山莫更違

戴冠

明月曲

明月入我帷徘徊不能語腹中生車輪雞鳴向何處

胡纘宗

上之回

上之回自回中隴山晴秋雲空上之回自終南罷期門
調雲驂上之回自岱宮帶三觀盤六龍上之回自汾河
泛樓船橫櫂歌上之回自瀉岳射赤蛟導神雀上之回
自大宛駕龍駒飛鳳憲居九重垂衣裳一人端拱千祀

無疆

東飛伯勞歌

東飛伯勞西飛雀佳人兩兩春相約長安游子紫霓裳
垂柳飛花空斷腸牆頭桃李爭紅白朱甍翠檻誰家宅
雨餘緩轡踏芳辰急管繁絃無那春紫駘嘶入晴煙去
窈窕秦娥隔花語

自君之出矣

自君之出矣明月滿中堂天外孤雲白君行何處鄉
自君之出矣庭草日霏霏千里春雲薄雙雙鴻雁飛

自君之出矣竟日掩金扉楊柳樓頭綠知君歸未歸

子夜歌

流霞飛白鷗月出杏花灣繫船閭門道春歸人未還

曾嶼

南洲歌

南洲春早江蘿生南洲日長沙鳥鳴郎君莫向北湖去
不似南洲煙水平

楊慎

雙燕曲

有鳥名飛燕雄雌自相將飲君玉池水巢君文杏梁美
人當軒坐恐涴羅衣裳請君驅除之君憐不忍傷離生
八九子嬌愛比鳳凰鳴聲何啾啾聞我庭東廂習飛還
不遠墮墜雙扉傍主人戒廬兒毛羽無摧殘不啄五株
桃不唼五畝梁秋風從西起翩翩向南翔昔為黃口兒
今為烏衣郎辭巢謝主人華屋恩難忘願主壽千歲歲
歲巢君堂

扶南曲四首

美人辭曲房羅綺雜花香遠思河邊草柔情陌上桑歸來庭下路羞見紫鴛鴦

清歌開笑齒一夜足歡娛誓好同心結迎祥百子圖千金當一刻城上莫啼鳥

遊賞上春時踟蹰望所思花嬌初學臉柳淺未成眉問訊溝頭水微波可致辭

淇上輕盈侶巫陽縹渺仙晚歸因鬪草春因為秋千羅

帳含雙笑燈昏尚未眠

垂楊篇

楚雄苴力橋有垂柳一株婉約可愛往來行此賦以志感

靈和殿前艷陽時忘憂館裏光風吹千門萬戶旌旗色
九陌三條雨露滋蒼涼苑日籠燕甸縹緲宮雲覆京縣
芳樹重重歸院迷飄花點點臨池見臨池歸院總仙曹
應制分題競彩毫詔乘西第將軍馬詩奪東方學士袍
金明綠暗留煙霧舊燕新鶯換朝暮只知眉黛為君顰
肯信腰肢有人妬從此沉淪萬里身可憐憔悴四經春

支離散木甘時棄攀折荒亭委路塵搖落秋空上林遠
婆娑生意華年晚腸斷關山明月樓一聲橫笛清霜坂

明月篇

桂樹生銀漢菱花掛玉臺山明姑射雪川靜海童埃北
戶燭龍蟄南枝烏鵲來清光殊窈窕流影自徘徊樓上
盈盈女樽前灑灑杯孤桐不須薦錦瑟正相推

大堤曲

大堤二三月垂楊千萬把上枝堪藏鴉下根堪繫馬藏

鴉繫馬晚樓邊沉水香焚清酒傳紅霞宛宛歌聲外漢
水團園明鏡前夜飲朝眠歡不足秋去春來芳草綠只
知郎橐盡黃金不道妾顏銷白玉江有方洲岸有沙牙
檣絲纜各天涯釵橫花困驚殘夢不信行人不憶家

出塞

烽火照甘泉刁斗出祁連錦車衝鳥穴翠眊度雞田高
柳分斜月長榆合遠天交河冰正結心斷玉門前

楚江曲

巫山花已紅楚水波新綠兩兩浣紗人照影鬪妝束笑

問竹枝詞何如采蓮曲

竹枝詞八首

夔州府城白帝西家家樓閣層層梯冬雪下來不到地

春水生時與樹齊

日照峰頭紫霧開雪消江面綠波來魚腹浦邊曬網去

麝香山上打柴回

江頭秋色換春風江上楓林青又紅下水上風來往慣

一年常在馬船中

最高峰頂有人家冬種蔓菁春采茶長笑江頭來往客
冷風寒雨宿天涯

清江白石女郎神門外往來祈賽頻風颭青旗香雨歇
山薑花開瑤草春

紅妝女伴碧江漬蓬草花簪茜草裹西舍東鄰同夜燭
吹笙打鼓賽朝雲

上峽舟航風浪多送郎行去為郎歌白鹽紅錦多多載

危石高灘穩穩過

無義灘頭風浪收黃雲開處見黃牛白波一道青峰裏
聽盡猿聲是峽州

滇海曲

碧雞金馬古梁州銅柱鐵橋天際頭試問平滇功第一
逢人惟說潁川侯

化城樓閣壯人寰澤國封疆鎮兩關雲氣開成銀色界

天工斲出點蒼山

湖蕩魚蝦晨積場市橋燈火夜交光油窗洞戶吳商肆

羅帕封頭楚婦妝

蘋香波暖泛雲津漁樵樵歌曲水濱天氣常如二三月

花枝不斷四時春

寄遠曲

濯錦江頭煙水綠相思萬里人如玉瑤琴別後不曾彈

今朝才理將歸曲

擬青青河畔草

河水清且漣
河上多芳草
春風二月時
千里交河道
交河漢
家營荒莽少
人行日暮淒風起
黃沙與雲平
雲間有孤雁
附書自鄉縣
翩翩欲下來
聞弦却驚散
草青雁北飛
草枯雁南歸
雁飛有歸時
征人無還期

南枝曲

并序

會川五里坡
纏纏哨邊有古梅一株
婆娑蔭映形如曲蓋
封蘚斑駁文如篆籀
蓋數百年物也予平生所見梅樹此為冠絕惜乎生於窮山絕域而不

得高人韻士之賞也玩歎之餘作此曲焉

我渡煙江來瘴國
毒草嵐叢愁箐黑
忽見新梅粲路傍
幽秀古艷空林色
絕世獨立誰相憐
解鞍藉草坐梅邊
芬蓋香韻風能遞
綽約仙姿月與傳
根地錦苔迷蟻縫
樹杪黃昏驚鳥夢
飄英點綴似留人
顧影徘徊若相送
焦桐椽竹亦何心
中郎一見兩知音
誰謂南枝無北道
願譜金徽播玉琴

伯勞吟

南中有鳥名伯勞禽經羽族稱雄豪曾隸九苞來揀竹
恥隨百舌繞蓬蒿青春受謝四月維夏茂樹薰風長林
短夜伊伊喔喔未有聲架架格格先雞鳴喈前停蜩笛
江上住鼈更熠燿收燈火蟋蟀罷秦箏村婦侵星提甕
汲山農帶月架犁耕戴勝降桑人共羨鶗鴂歇芳君不
見寄信難憑北去鴻單棲肯逐西飛燕故鄉迢遞水雲
深客遊聞此樂驚心何時高枕松窗下細聽桐花小鳳

吟

齊之鸞

擬古少年行

馬首青絲絡腰間百寶刀旗捎霜葉下剪拂嶺猿號意
氣輕儒吏飛揚見爾曹誰知杜武庫談笑靜江濤

常倫

采蓮曲

素月開歌扇紅蕖艷舞衣隔江聞笑語隱隱棹歌歸
棹發千花動風傳一水香傍人持並蒂含笑打鴛鴦

唐臯

楊白花

楊白花飄飄落誰家渡江江水闊江岸多泥沙歸來舊時樹不妨舊棲鴉楊花不來楊葉愁江水晝夜隨東流

林炫

傷歌行

楚人不識鳳謂是五色雞魯人不識麟謂是麪而蹄天時苟不值賢聖終見嗤爰居避海風享祀將奚為寄言

明哲士樂命安蓬闈

李濂

苦寒行

長安列繡衢青樓是倡家重闈隱鴛鴦暖幕霏煙霞密
靉豈能入迴廳無奈何紫貂邯鄲兒登樓拉雙娥趙舞
小垂手吳歛揚秀蛾酒酣呼六博梟采明如花厭厭翡翠
翠帳冉冉春風和笑問樓上人今年寒詎多

大堤曲

漢江遊女花艷奇靚妝連袂江之湄人生不向襄陽去

寧信春風斷腸處

蔣山卿

烏夜啼五首

門前楊柳樹借汝烏夜棲郎眠夜未半無奈汝爭啼
郎起見月光綺窗白如曙儂歡不成寐郎起渡江去
月明潮欲生三江風浪惡勸郎且遲留莫便將衣著
長帆百幅餘大舸夾雙櫓回頭歛不見儂心苦更苦

從歡出門去天寒獨自宿門外單棲烏夜夜啼上屋

采菱曲

驚船乘滉漾弭櫂弄漣漪拾葉縈荷蓋牽絲亂荇枝比
鏡那能照為盤詎易持望美徒延佇日暮重相思

新妝麗且鮮越女鬪嬋娟飄風落紅粉濺水濕花鉢紫
莖牽更直碧葉聚能圓採摘將誰寄私心祇自憐

從軍行

雪嶺愁雲凍不飛黃沙白草路人稀邊城春色惟看柳

看到青時春已歸

薛蕙

君子行

君子思危懼不終日衆人居安沒齒自逸君子思退如迫于淵衆人思進如逐于田損益之變何其相反苟非明智孰能及遠人知其終莫知其始吉凶之萌鮮不由已上天無私何怨何親福不擇家禍不索人道有險易事有從違嗚呼小子慎爾所之

雞鳴篇

雞初鳴日東御月徘徊招搖下雞再鳴日上馳登蓬萊
關九闔雞三鳴東方旦六龍出五色爛

趙瑟曲

春風初闌花半落美人挾瑟坐重幄促柱催絃勸君酌
勸君酌為君歌君不飲奈愁何

折楊柳

三月盧龍塞沙中雪未乾朝來折楊柳春色憶長安

莫愁曲

儂家住石頭綠水繞歌樓不是工娛客何緣字莫愁
江水映江花春光滿狹斜金陵衆年少爭到莫愁家

遠遊曲

五岳之山君遍過名山不比浙江多赤城直上仙人闕
天姥斜連織女河

太白仙人高士流十年不出臥滄洲爾去相逢託相訊
南來儂許共扁舟

越中會稽天下無金庭玉室是仙都即向山陰覓芝草
還從禹穴探靈符

鏡湖綠水畫難成五月南風菡萏生越女舟中歌白苧
道人醉臥酒船行

寶劍篇

昔聞歐冶鑄寶劍冶中蛟龍歎揮霍冶開火歇蛟龍失
點點青雲吐芒鍔赤山丹液氣鬱勃白帝金精氣縈薄
翠珉磨出冰洞明寶鞘裝成金錯落鶻鵠膏瑩科斗字

鹿盧玉映芙蓉萼坐上傳看疾風起尊前拔舞驚虹躍
螢尤蒼黃化石墮天吳辟易隨潮却果然魑魅忌精爽
坐令神物藏冥漠由來世事不可測須臾淪落豐城側
玉珥彫零苔蘚昏雪花蠹蝕塵沙黑當年得意斷犀象
今朝失路埋荆棘地底龍眠鬼猶泣斗間氣騰人未識
泥塗汙辱君勿悲風雲變化時將逼掘獄重開雙寶刀
入市爭酬萬金直自古英雄每如此平生蹉跌長歎息
哀歌謾作行路難高飛自有橫天翼

張治道

青樓曲

長安狹邪綠水濱
青樓羅綺暗生春
碧紗窗外東風起
飄落楊花不著人

舒芬

青青麥

并序

棗林泊舟登岸觀麥時四月而麥尚青也賦青青
麥

青青麥四月天平田萬頃浮綠煙農家鋌艾翹首待風

苗露粒珠璣圓

秋雨古詞

西風一夜雨新涼入單被不管客中人寒衣未曾寄

胡侍

采蓮曲

棹謳宛轉發中川隊隊紅妝競采蓮欲就前溪問名姓

蓮花當住木蘭船

王廷陳

白紵詞

高堂邃宇施翠帷蘭膏明燭散朱輝二八接武步舒遲
被服絢麗光陸離彈箏鳴瑟商羽移喜溢歡恣不自持
轉盼含嬉屬所私累觴勸君君自知主人既醉客不辭
燭滅纓絕珠履遺

投君漢濱之玉珮獻君洛浦之明璫感君提携祝壽昌
舜日堯年樂未央為君楚舞紈袖揚乍開乍合低復昂

嬌若白鵠雲中翔雕楹綺閣迴素光竽瑟會節間笙簧
樂極悲來起彷徨共指皎日輸肝腸烏白馬角誓不忘

楚岸吟寄牟子

楚岸長楊垂至地百鳥嬌啼春自醉晴絲冉冉墮碧空
風光頗為遊人媚我家黃子國君住郢王城大江東下
雲霧接滔滔應瀉故人情憶初同領南宮宴白馬青袍
花映面本期霄漢並翹翔寧知世路多更變我歸十年
前君歸十年後榮華顛倒若夢中人情翻覆無不有安

能顧墮覲自令心不開陰巖積古雪白日何當來我將
振衣從子遊請君灑掃鸚鵡洲遲日經行桃竹杖煙波
搖漾木蘭舟須令漢水變春酒更遣大別為糟丘蛟龍
自吟鶴自舞仙人鐵笛沈高樓留連坐待明月上翠娥
勸飲來沙頭竹林諸賢真瑣瑣高陽酒徒安足儔吁嗟
此會難即得使我悵望無時休君不見楚宮寂寞臺殿
荒歲歲東風開野棠三閣顯額行吟處千古猶傳杜若
香丈夫眼底安足計君行采采莫相忘

妾薄命

春風轉蕙披蘭高臺曲榭中連經堂入奧張筵秦箏趙瑟俱前鳴絃度曲雙妍輕舉純袖禮襯宛若游龍翔鸞翠盤金爵闌干呈能角技為歡種種厭射更端眼看陽景西馳高張蘭燭承暉車倦馬急不辭但歌不醉無歸夜深坐促尊移含悰送意向誰衆中色授君知願言並蒂雙棲惡聞易別輕離佇立不勝彷徨獨宿寤言難忘何以報君明璫起視銀河爛光牛女咫尺相望終夜不

成報章

子夜春歌

初華錦繡舒千林望如一懷春廢機杼纏素難成匹

子夜秋歌

貪看秋月光夜久不成寢四顧寂無人玉階有雙影

對酒歌

人生稟靜躁物則準方圓錐刀各有能情好各自妍陰
霽難並祈恩怨豈兩全於此雖不容於彼獲所安人無

億萬身何能徧周旋兼濟聖不贍榮枯有自然富而如
可求尼父願執鞭

許相卿

古意

新月生西嶺明河低遠林坐見大火中秋序忽見侵感
歎老將至徘徊勞我心勞心復誰語聊撫東廂琴調高
曲未竟寥和難為音矯首文江子何時宣此襟

楊士雲

四望謠

望蓬萊駕蒼龍棗如爪獻木公

望崑崙驂白虎觴九霞進王母

黃佐

淡交行

瓊樓十二中天起弱柳崇桃鬪青紫魚鑰初開鶴蓋來
平頭奴子皆珠履主人愛客名謳出象琯鶡絃滿人耳
臘鷁膾鯉騰羽觴文笙黼帳春風裏當筵意氣何所如

以漆投膠差可擬舞罷陽阿花作陣歌殘子夜霞成綺
豈知戈戟在談笑回看堂上生荆杞雨雲翻覆噫吁嚱
前有張陳後蘇史君不見君子之交淡如水

西清詞四首

碧殿崢嶸槧泰清飈臺時送步虛聲流鈴擲火飛章地
一片雲遮翡翠城

輦道陰森萬柳齊水晶簾幙動晴霓六龍行處金蜩合
冉冉紅雲閭苑西

紅葉飄颻出御溝銀屏金屋不知秋侍臣鵠立空翹首
日色曈曨滿鳳樓

減却雲鬟帶玉冠紫煙衣薄露光寒步虛聲裏琪花落
贏得君王轉盼看

采蓮曲

隔花相見兩徘徊蕩槳低頭笑不來雙棲白鷺忽驚起
遙見浮萍一道開

張舍

龍池春遊曲

紅心草茁紅桃開龍池森森春水來春鳥啼不歇春燕語更切少婦踏春遊傷春無限愁紅蕖蹀躞曳羅襪羅襪塵生暗香發密意難傳陌上郎含羞折花空斷腸路佇路側盼斜陽

董穀

臨清柳枝詞二首

春早持齋一月餘羅衣初試覓香車丁寧夫婿嚴齋禁

頂上歸來始破除

結束腰肢細可憐女奴相送上鞦韆風光又是清明近

墮却金釵記去年

文徵明

次韻吳尚德先生江南弄

煙霏曉色彤樓開美人倚醉臨妝臺韶華孰駐顏如玉
鏡裏年光轉朱轂春風江岸蘿蕪綠落盡閒花綺塵馥
翠屏自度春寒曲簾箔重重燕雙宿

春曉曲

翠塵沃日煙霏霏彤光飛上千罘罳誰家高樓鎖春色
金鋪約戶蟠雙螭東風掠幌鸞綃動瑤鴨蘭溫睡初重
起來臨鏡悄無言含情自理雙鶯夢夢回生怕守宮殘
捲袖移鞚獨自看燕子銜春欲飛去海棠猶自勒輕寒
簾幕垂寒朝不捲綺疏結香春較淺欲裁羅段作春衫
自熟薰爐熨金剪

蔡羽

搗衣篇

夜迢迢草白露寒衣未曾絮碧杵白玉牀桂花新水香
長廊曳屨踏月光莎雞出戶蠻入房金井梧桐生夜涼
涼風起聲轉促繡閣璫窗滅明燭悽淒玉關情秋來亂
心曲亂心曲其奈何銀河咫尺愁風波何況桑乾道路
多

尊中有明月歌

尊中有明月琴上有素絃美人能彈客能飲玉壺正傍

花枝邊皓齒對嬪娟清輝相共憐紅顏笑桃李獨立無
比妍月不常圓花易落蛾眉却怕秋霜薄良會難須行
樂為君高歌勸君酌酌未終歌轉哀金壺銀箭急相催
春光今夕爭時刻傾盡車渠三百杯

鞦韆怨

丹楳朱干傍花砌青絲流蘇兩頭繫葡萄結束相思帶
玉釵斜挽盤龍髻對對來尋花下繩雙雙去作雲間戲
難消寂寂玉樓情可惜青青芳草地玉樓易斷腸芳草

今心亂空上鞦韆架春愁未曾斷

蝶篇

西園蝶叢叢映花葉十五佳人二八姿鴛鴦帶長芳草
貼妾面如花步輕捷粉蝶紛紛上眉顰長安踏青天氣
和千叢萬叢情緒多蹴得游絲落釵翠牽來草露濕衣
羅遊絲亂草露長美人欲行空斷腸綠潭紫磧迴花房
銀錢瑣碎雜柘黃飛入桃李花落地亦成香花落留胭
脂蝶香無斷時相邀入羅扇起舞嚙蛾眉蛾眉轉低草

轉碧日暮江天欲何適
梁園應有未歸人
章臺豈少思家客
思家未歸春已殘
悠悠蝶空合
歡芳草年年成永歎

永歎

謝承舉

古意

峩峩石頭城下有長短亭
城前江茫茫
亭邊柳青青
行人重離別
詞客傾醞醞
東望莫愁湖
西連白鷺汀
華輶送疊鼓
危櫓掛飛船
隔岸商女歌
歌聲君莫聽

自君之出矣

自君之出矣
開遍芙蓉花
思君如花枝
嚴霜脆瓔華
自君之出矣
月圓十五回
思君月掩雲
狂風吹不開

吳歌

秦淮女郎歌
柘枝隔岸吳兒唱
新詞聲聲互答
綠楊裏
正是離人腸斷時

離人莫聽女兒歌
盈盈一水滯天河
兩星低望不可渡
河上無梁空擲梭

美人隔秋水

美人隔秋水可望不可即空有木蘭舟未得西風力維
舟杜若洲汀花好顏色見花如美人采采轉憂惻我心
傷所思耿耿情何極水流深且長安能有羽翼佳期會
當來惟以永相得

金鑾

采菱曲

采菱秋水旁驚起雙鴛鴦獨自唱歌去風吹荇帶長

竹枝詞

春雨春風花意狂誰家溪上浣花娘水流不管花心亂
花落能教水面香

春城曲

雨餘芳草遠萋萋春暖遊人信馬蹄日暮畫樓歸去晚
落花香裏路東西

邢參

竹枝詞

家住東吳白石磯
門前春水浣羅衣
朝來繫著木蘭櫂
閒看鴛鴦作對飛

御選明詩卷九

欽定四庫全書
舊要卷一萬八千五百十

集部

御選明詩卷十

樂府歌行七

王寵

陽春詞

春到江南春可憐東郊西郭得春先初飛蛱蝶猶疑夢
忽見梅花各問年鸚鵡洲邊芳草積鳳凰樓下百花然
王孫拾翠爭相問美女尋春總獻妍千金買得飛龍馬

八寶裝成軟玉鞭啼鳥亂羣還自對游絲爭繞暗相牽
勾吳樓閣如天上別有紅妝笑相向雲屏珠箔正昭回
錦樹璫花次第開傾國能誇神女賦凌雲還有茂陵才
欲移角枕鮫綃帳先挂冠纓翡翠釵春色年年歸有期
勸君須惜少年時春去春來人不見花開花落日相思
昨日朱顏渾似玉今朝白髮已如絲年年暗受傷春病
不與楊花燕子知

鄭作

醉歌行贈懋昂別

我持白玉壺酌君黃金卮
我為楚歌君楚舞並言行樂
當及時憶昔少小携名娃
千金調笑聽琵琶青絲絡酒
穿芳草白馬尋香踏落花
可憐綠髮不相待舊遊回首
今誰在

程誥

春江行

壚頭新酒柘枝黃郎醉尊前不上牀
一聲鳥啼天未曙

東風吹上巴船去

浦口曲

家臨五溪水浣紗歌浦口恐有寄來書君行見郎否

朱應辰

東湖曲

曲岸香風起汀洲采白蘋鴛鴦浮綠水偷眼蕩舟人

余育

貧女吟

舊絲織盡復新絲辛苦終朝不下機
祇恐與時花樣別不堪裁作嫁人衣

木公怒

采蓮詞

弱袂長鬟蕩水中釷文釵影入荷叢
鳴榔驚起韓朋鳥一箇西來一箇東

徐階

太廟迎神曲

肅肅兮廟廷列炬兮孔明秉予誠兮上達迓諸帝兮垂
歆望鸞輿兮龍蹕來雍雍兮太清

太廟送神曲

神之至兮御靈風神之去兮歸天宮贊天恩兮佑我千
秋萬歲兮廟祀攸崇

潘恩

塘上行

綠蒲生中池其葉何蒙茸與君締昏媾焉知鮮有終三

月楊柳花飛泊隨春風入洛化為萍吁嗟無定蹤衝波
一相激葉葉自西東我心元不移君情忍中絕妾生禽
不如鴛鴦故成列妾生草不如絲蘿可高揭妾生木不
如連理枝糾結越鳥豈北翥吳江不西旋妾生一以棄
苦相誠可憐恨無奮飛翼委志畢君前

張時徹

古意

我以青龍劍酬君綠玉琴朝為郢中曲曲盡愁予心徘徊

徊白日暮仰見雙飛禽

南山桂樹黃贈此連理枝今茲楊柳綠春風日相思君
看龍頭水猶自東西馳

邯鄲有姝女能為秦楚音芳菲何太盛棄置獨傷心只
自憐顏色君門萬里深

上壽歌

金叵羅玉屈卮奉君高堂上長跪前致辭君王有道四
海雍熙胥悅康永無為宣朗鼓譜墳篋今日樂相樂萬

歲以為期齊三光並兩儀

宛轉歌二首

玉柱調金徽和歌宛轉宛轉歌芳堤步羅襪綠藻蕩流
波七襄織就鴛鴦錦夜夜停機思度河

明星粲露華泣宛轉歌歌宛轉月白鳥夜啼絃長曲何
短綠水芙蓉夜夜開芭蕉葉落心常捲

自君之出矣

自君之出矣雕梁復生燕思君如斷石投水不可見

自君之出矣鬢髮如蓬捲思君如井幹時時轆轤轉
自君之出矣余枕歇芳蘭思君如明星夜夜在雲間

搗衣篇

鼓瑟瑟夜何其月明露白風淒淒闌干北斗映南箕莎
雞入戶流螢飛鳴玉珮步瑤墀揜皓腕出鳳幃念君不
歸搗君衣心煩力疾雙杵揮寒影散亂聲參差輕絃舉
繡帶垂調玉節淚交頤庭柯葉落烏夜啼流音回轉聽
者悲熠熠魚舒錦出自流黃機裁為合歡被夜夜待君

歸君今未解黃龍戍賤妾年年空搗衣

江南曲

采蓮復采蓮蓮塘清見底前有鶼鷀遊後有鴛鴦戲朝隨海潮來暮隨飛鳥去生作江南人慣識江南路

秋胡行

衆鳥有匹胥遨以遊摯而有別實惟雎鳩彼誰者子矯矯卿侯突而好我中心孔羞卿有婦兮妾有夫悅彼姝兮曾雎鳩之不如兮一解倉庚喈喈春日載陽執我懿筐

采彼柔桑彼誰者子車馬龍驤含情流睇黃金是將獸
有穴兮鳥有林卿有金兮不如我有心兮二解明日月

照臨下土女子有行畏彼多露彼誰者子繡衣朱輶美
也可悅不念其故山有木兮水有魚子不信兮孰可與

同居兮

三解

閭閻曲

穀熟不到釜絲成不上身莫道江南樂江南愁殺人

采葛篇

種葛南山下春風吹葛長二月吹葛綠八月吹葛黃署
鍊逝采掇織作君衣裳經以長相憶緯以思不忘出入
君篋笥長得近輝光層冰布河水中野皓凝霜吳羅五
文采蜀錦雙鴛鴦君恩當斷絕歎息摧中腸中腸日以
摧葛葉日以衰願留枯根株化作萱草枝

隴頭流水歌

隴水下隴頭東西南北流浮萍逐隴水一去不復收
隴坂迴九折七日乃得越如何下隴水瞬息成訣絕

殘月寶刀白微霜隴樹黃笛中聞折柳那得不思鄉

俠客行

登君堂把君肘生從衛霍遊復與金張友主讐尚不報
肝膽向誰剖脫下驕驕裘換得新豐酒千錢作使邯鄲
倡北斗闌干掛朱牖平明走馬長安中翻身戲折章臺

柳

子夜四時歌

朝朝聽鵲報日日掩重闌莫踏門前草留踪待郎歸

乍來結女伴江頭去浣紗問訊郎消息夜來燈燭花
女郎宛轉歌輕舟棹碧波打動明珠碎團團落青荷
日出望車塵徘徊至日曛拾得紅蒨草染就石榴裳
淒淒復淒淒月出光尚微郎衣猶未綻何得理儂衣
惻惻復惻惲桑黃秋露白持麻不能餐持麻不能織
夜來風似箭晨起雪盈牀侯門教歌舞剪綵鬪紅妝
河水結層冰疾風吹曠野嗟爾衣裳單獨宿在車下

幽澗泉

幽澗泉飛珠玉道傍白花細如粟繩樞小戶架山麓翁
析薪婦煮粥小兒敲冰斷青竹風吹草屋寒蕭蕭

潯陽歌

九江江水九流盤彩鷁朱旗霄漢間七十二峰今夜月
龍門相對駱駝山

錦雲堆樹浪花長桃李飛來片片香打鼓鳴橈何處客
怪來驚散兩鴛鴦

澤北喧喧商賈盧澤南隱隱蛟龍居蓬頭赤腳沙中子

蕩槳拏鉤學捕魚

漁郎渡頭燈火明
潯陽市上酒旗橫
沙白水清煙月冷
琵琶猶作斷腸聲

陌上柳

陌上柳陌上柳春風披拂長短條不知攀折誰人手為
問去年折柳人今年柳發歸來否唯朝飛車轔轔柳花

飛飛愁殺人

江上行

東風乍雨還乍晴十里百里聞流鶯春波淼淼淨素練
春山簇簇行盡屏江上花飛已如霰澤中蒲柳何青青
五陵俠客金驃裏瀟湘美人瓊玉箏珊瑚寶玦照碧草
飛絲急管喧層城繡服凌雲翡翠動香輪壓霧鴛鴦驚
日中鬪雞馳道塞日暮槌鼓紛吹笙金陵美人鸚鵡杯
桂櫂蘭舟不計傾相看莫放赤日落白石清沙無限情
鳳凰臺上鳥初下白鷺洲前笛一鳴歸途况值明月光

回首猶聞白苧聲

還山行贈林屋山人

秋風多秋水波行人擊汰歸山阿朝辭鳳凰臺夕宿蒲
葦中月照江流白霜催山葉紅征途已蕭瑟鴻雁互西
東行看洞庭樹遠在煙生處結廬枕山石時時戴雲霧
未種鹿門田歲月奄已暮山中九月甘菊黃山家美酒
鬱金香蒼松蔭地百尺長好呼仙客行羽觴羽觴速絃
柱促玄鶴為我舞長歌紫芝曲拂袖還沾龍上霞著書
應長門前竹竹葉何青青霞光何盈盈辟穀餌金石凌

虛躡太清靈巖瀑布日夜懸下有野雉雊遠田林間彷
彿白玉童雙吹鐵笛上青天林屋之山清且虛為問瑤
草今何如湖上若逢雙鯉魚煩君惠我尺素書

高叔嗣

古歌

荆和當路泣良璞為誰明茫然大楚國白日失兼城燕
石十襲重魚目一笑輕古來共感歎今予益吞聲

狄沖

臨淮思

淮之水兮清且濁思若人兮情夷猶遡予舟兮夕逝願從之兮靡由淮之水兮清且駛思若人兮不能已抱多病兮焉投隔淮湍兮千里淮之水兮洋洋曠我情兮難忘永悠悠兮冬夕輾轉反側兮未央悲莫悲兮生別離我思君兮君不知臨北風兮墮涕屬孤雲兮南馳

豐坊

桃萼

東風一夜吹桃萼桃花吹開又吹落開時不記春有情
落時偏道風聲惡東風吹樹無日休自是桃花太輕薄

南隱歌

步出城南門曠然遠塵俗江流奔白龍山色凝蒼玉丈
人別業元近家時鼓瑤琴對碧霞曲終拂衣無一事閒
看仙人掃落花

春遊曲

十旬風雨清明節昨夜窗前見新月喜謂春晴可出遊

平明携樽南陌頭
陌頭不見花開處
城中城外多桑樹
桑樹連天綠葉濃
落花盡在春泥中
春泥浩蕩從馬踏
香魂宛轉蹄躞蹀
看花淚眼忽潛然
人生安得長少年

鄭旦

子夜歌

聞郎住瀟湘
裁書寄雁去
郎行無定踪
書寄知何處
欲織雙鴛鴦
終日才成匹
寄君作香囊
長得繫肘腋

蘇祐

擬四時詞

錄二首

瓊樓十二闌簾捲怯春寒燕泥香墮地知是杏花殘
寒漏滴疎窗凍雲滿虛閣梅花自多情對雪開如約

子夜歌

相逢采蓮船含笑各分首憐君目送妾直過橫塘口

竹枝詞

依依江柳弄煙絲粲粲江花映竹枝莫把竹枝翻別調
轉愁折柳送行時

鈿蟬金雁惜春華寂莫東風到妾家惟有江頭明月色

夜深共對木蘭花

陸埠

築堤謠

彼田高我田低高田積土河成蹊低田年年催築堤築
堤復取田中泥去年大水百穀傷高田得熟低田荒今
年土龍雨莫禱高鄉之田為茂草

樊鵬

楊白花

楊白花一夜風吹去知他飛飛落何處金屋重重閑不
開哀鴉啼盡宮中樹

袁袞

長干曲

停橈暗相語妾在長干住郎亦秣陵人便可同舟去

西蘆詞

秋雁集復飛寒潮明更滅日暮風起時蘆子花如雪

君家滻瀆城城西蘆子渡蘆子何蒼蒼秋風吹白露

金陵歌

夾岸垂楊起畫樓秦淮煙浪接天流朝朝桂槳來江口
夜夜蘭燈集渡頭

馮恩

寒夜曲

一點清暉入畫欄西風吹送雁聲殘冰心不共銀缸暖
繡閣翻如玉塞寒

游俠曲

燕市來過劇孟家深心杯底薄聲華寶刀偃月雙飛電
紫馬嘶雲散五花

花艷蘭香綠酒澄當筵意氣欲馮凌方調綠綺看彈鶴
又著紅衫出臂鷹

蒲萄新熟馬漁芬垂手齊翻舞翠裙萬騎嘶風和笳鼓
雙丸驚雁落空雲

碣石篇觀滄海

東臨碣石滄海無涘靈若勃怒超騰如駛齊入汨出輪
天軸地連涎八裔飛沫萬里日月星辰乍沉乍起瓊樓
金城十二邇迤願隨神仙龍鞭鳬屣一越三千遊戲其
裏幸甚至哉歌以詠志

前緩聲歌

遙望崑崙曲層城聚遊仙羽輪任遐舉環珮鳴翩躚睇
髮闔風上彌節候嶺巔青鳥翔瑤池女英來湘川服日
從東華餐霞追偓佺嚙嚙玉鸞響肅肅雲車旋琴高揮

綠水太容奏朱弦玉醴與金漿永娛壺中天願言惠皇
家寶錄綿萬年

車遙遙

驅車何遙遙遙遙不復返不如車上塵逐君車輪轉

李開先

塞上曲

虎旅紛紛列虎牙龍庭漠漠走龍沙未交八月先飛雪
已盡三春不見花

一春不見煖融天自是要荒氣候偏落地雪花原是雨
漫天榆莢不成錢

陳束

高陽行

高陽少年事橫行重俠由來不重生奪得雕刀搖雪色
騎將飛馬蹙風聲

周復俊

有所思酉水舟次作

去年三月滇水陰今年二月沅州路風光晚晚愁殺人
春色飄回忽遲暮楊花昨夜春泉發竹寨沙邊弄明月
始見繁花復亂飛愁夕不願理春衣花飛已怯傷春別
何忍還聽喚子規沅湘兩岸垂楊碧白日牽絲送行客
草際煙橫浦漱香江聲千轉流雲長夢魂驚載宿水廣
何由渡王孫天末未歸來公子江南先有賦公子王孫
散夜愁愁人難下杏花樓樓臺萬鬱迴清漢山水清圓
映去舟停橈日欲晚紫嶂猿啼遠何處積幽思幽思似

隴坂臨流歌復歌濯纓瀟湘裏菁菁芳草心眷余紛何
已浮雲有時卷草色幾時結相送過吳宮殷勤向君別
吳宮翹望轉逶迤層層玉樹蔭連櫪芳菲帆浦迷香徑
窈窕菱潭帶竹池萬里淹仍西復東一年涼暑春徂夏
春臨絕嶼叩文鶯曉涉空津浮白馬我日思歸今得歸
山中美人音信稀東風浩蕩吹梧樹極目天南鴻雁飛

王梅

江干曲

估客乘潮去春風幾度寒江潮元有信日日至長干

白悅

武夷山九曲櫂歌

錄二首

風塵飛鳥探山靈春水浮槎曉氣清遊息潭忘歸路迴

中天明月照溪聲

仄磴嵒嵒覆石巖松篁林接影繆繆仙家白晝無啼鳥

滿樹桃花映碧潭

張謙

東門行

步出城東門泛彼河上舟河流東北馳念子悵悠悠子
行一何遠乃在渤海頭白日照遼陽朔風吹高丘王事
各有程焉得斯須留執手淚盈把杯至不能酬垂楊夾
廣衢有鳥聲相求感之增煩惋怨彼道路修丈夫自有
懷豈若兒女儔贈子明月珠照耀光九州所期在同心
千載為我述

張瀚

歸鶴篇

皎皎雲間鶴不受氛塵侵
幽人一以贈馴為堦下禽
春風舞翩翩秋月唳清音
經年託儔侶欲別意難任
念非夙所隨還歸嘉樹陰
客既眷故鄉鳥亦適故林
去矣物無累懷哉誼已深
願比雲霄翼常同萬里心

劉繪

綠水曲

杏雨紅初散楊煙綠半消
日上金妝麗風迴繡帶飄
含

情聽燕語泣淚惜花嬌流瑞波影裏明月蕩輕橈

春遊曲

春光九十日一日莫虛過雪映疎梅影風雜早鶯歌蘭
橈戲雨濱玉騎踏香莎名姝調麗曲飛觴莫厭多

施峻

撒秧謡

東阡有田三千畝秧穀已撒十五斗去年薄收難接新
種得早稻方救貧相傳今年晚更好十分祇宜一分早

東隣西舍皆晚禾我種早稻知如何

王燧

折楊柳

楊柳何青青偏令別恨生連芊多宿雨流轉更新鶯
裏曉煙中枝枝春色同顰眉照芳沼著意拂香櫳含情
不忍見手弄千條線弱線不禁吹歷亂花前颭柔條易
攀折思遠令心煩花飛隨風遠那能到塞垣聞有新戍
人遠寄一枝春只恐寄到時棄擲同妾身

茅坤

南山行

行行入南山蘿蕪日以深不見津亭吏但聞鼯鼃音夕
陽猶在樹谷風起中林下有種豆歌歎歎傷我心

我心空自摧太息今與古上山多飢鳶下山多猛虎道
路寂無人日暮楚三戶停車一以悲深林有巢父

巢父無名子相對語瓜田夜聞李都尉醉獵南山前射
殺白額虎飛鳥落青天歸來感往事叱詫黃金鞭

金鞭勿復揮古來事如此仲連破聊城辭爵歸田里子
房定漢室言從赤松子何如酌金罍酒酣猶熱耳

喬世寧

江干曲

送君曾水上臨水即相思不似錢塘水潮來有信期
江上與君別日來江上看知隨江水去猶自立江干

鴻雁行

鴻雁何聯翩聯翩西北朔西北曠何許逝將之塞疆我

有一書札緘之金玉箱將以遺所思道路阻且長因風
託羽翼為爾立彷徨去時春草青歸當秋草黃草黃歲
將晚毛羽恐摧傷願言愛毛羽邊塞多風霜

王問

越女辭

盈盈越川女川上採蓮花花深隱紅妝輕風吹臂紗花
葉紅零亂隔浦弄明霞日暮獨歸去雲門是妾家

翠翠辭

翠翠復翠翠雙飛亦雙止西風吹老芙蓉枝水冷河清
魚不起朝從南海去暮仍珠樹歸娟娟波心影飄飄身
上衣今日沙頭忽不見點上吳宮美人面

江南樂

鼓城作

朔風吹沙暗河縣隔水桃花不相見江南春早花滿蹊
上枝下枝鶯亂啼此時水曲豪華盛碧榭紅樓相隱映
浦口浮橈蘭桂香陌上流車翡翠光三吳貴遊秦川女
流盼山隅隔花語邊入紫雲吹鳳簫風飄歌曲度寒宵

千金激賞雙鴛起今日花前為君死樓船錦筵猶夜開
燭光清凝綠水迴美人醉後金鉢落忘却銀箏在山閣

鞦韆行

顧園作

東風桃李鬪芳辰城邊陌上啼鶯新當窗美人罷鍼線
並結鞦韆招比親百尺長繩掛香霧結束衫裙學仙舉
一回蹴踏一回高漸絕飛塵逼清宇幼女十五纔出閨
舉步嬌羞花下迷自矜節柔絕輕趨不倩人扶獨上梯
春意撩人重離析每出邀憚不知夕柳暗沙昏未肯歸

汗濕絞鮠不愛惜此戲曾看北地多三三五五聚村娥
笑聲遠出垂楊裏倦遊歸客意如何今日江南初見此
麗人如花映瑤水金飾丹題綠作繩宜在君家牆院裏

陸樹聲

玉河春水曲

積石金隄駕落虹波分千練影長空無端亂湧桃花片
猶帶輕紅出漢宮

何良傅

雷陽歌送馮南江赴戍

雷陽三月濤聲怒漲海冥冥亂煙嶼伏波廟前苦竹低
雷公山下鶩鷀舉氤氳霾霧濯陰霓光輝火雲蒸毒雨
一自三閭遭放時身乘文豹驂蚪螭忠憤氣排闔闔動
思君淚落天南垂馮君崛稱三吳彥覽輝振翮風雲顫
巍峩繡服鳳凰臺嶙峋諫草麒麟殿不惜捐軀批逆鱗
寧辭伏竄窮荒甸昔騎驄馬侍龍樓今聽哀猿到粵洲
壯志由來狹四海豈應鄉土增離憂君不見蘇叔子僦

居民舍猶遭訾竒絕翻憐壯遊風流盡付羅湖水又
不見寇萊公郡圖來獻城門東始知履歷非偶爾賸有
蒸羊贈狡童爾來四百五十載二公精爽今猶在此地
淒涼君再過仰看萬里風塵改明朝遙矚嶺南雲長虹

夜夜流光彩

胡安

柳枝詞

惜取楊枝暮復朝未經攀折欲魂消閒中喜得無離別

緩步春風灞水橋

魏學禮

采蓮曲

煙中一葉采蓮舟
兩岸香風正早秋
瞥見江南明月上
玉簫吹斷紫雲愁

朱曰藩

秋闌怨

合歡樹上鳥欲棲
空房織錦寶家妻
遙遙夜夜誰能奈

三三五五並相携
鏡花對影慚雙笑
燭淚分行伴獨啼
莫道迴文能妙絕
陽臺雲雨隔安西

雲中樂

塞門楊柳未經霜
錦帕貂裘馬上妝
帶得相思出關去
銀釵嶺上斷人腸

方九叙

涉江採芙蓉

六月江南天家家出採蓮並舟青雀近分歌綠水連看

花誤是面摘葉戲成鉢夕陽歸渡口更覺晚粧鮮

王樵

短歌答趙江都金山見懷之作

海門兮長風中流兮孤嶼美人兮何方覽大江兮東去

孫承恩

江上曲

春雨既過行水濱江花汀草相鮮新牧童歌上前山去
愁殺江天行路人

章美中

暮相思

征帆日已遠
回波不相待
暝色孤峯來
故鄉何處在
日淡墟煙裏
雲盡天邊海
如何暮相思
坐令鬢容改

王好問

春江曲

東風度江城
四山漾新綠
江頭蕩舟人
載酒過江曲少
婦白苧歌風吹
斷還續春鳥似
相依雙雙沙上浴

劉效祖

折楊柳

楊柳千條拂地垂春風送客妾心悲誰家年少輕離別
偏把愁聲笛裏吹

塞上曲

龍沙近接古檀州多少從軍倚戍樓寒夜不堪愁絕處
西山片月挂城頭

李叡

代美人春怨

行行下長浦玉手把荷葉昔日妾倡花今朝花笑妾妾
年十四盛鉛華不數城南大道家蜀錦吳綾耀朝日蘭
闌一步猶嫌賒人言嫁向兒家好不悟兒家重金寶當
時學得十三腔只今遺落如風掃易州青銅碧窗內照
去照來自不愛瑤珮簾囊若有知羞向儂家腰下帶曲
檻薔薇嫋嫋新池亭明日委芳塵東隣少婦常悲泣不
怨兒家輕薄人

送遠曲效溫飛卿體

游絲著柳曉成醉湍浦鵝鵠暖晴媚金翹玉馬欲臨關
惟有離腸與粉淚前高山晴花覆頭每時看好今看愁
野桃結子幽厓裡落盡春風餽鶯鳩

橫江詞

采菱莫近秋駕船莫近洲秋菱刺傷指洲淺風難使橫
江女兒顏如瓊弄花簪柳隨娘生笑拈竿子撒波去不

解蘆中孤雁聲

許國

結交篇

種樹不成陰不如爨下薪
結交不得力不如行路人
路傍共休息欲去還逡巡
奈何轉盼間不念平生親
平居接杯酒自謂雷與陳
一朝事相涉化為越與秦
緩急固時有所貴相憐振安用空綢繆愧彼伐木聲

林如楚

采蓮曲

鏡湖春水綠越女顏如玉桂楫木蘭舟齊唱采蓮曲翠
鈿窈窕空明空沿纖手徘徊弄清曉薄采那妨馬上郎含
鼙却望雲邊鳥年年采蓮湖水邊清歌艷舞愁堪憐蘭
燈寂寞青樓晚掩淚猶看並蒂蓮

長安俠少年

長安俠少年寶劍光如雪朝馳御道春夜醉倡樓月

胡汝嘉

子夜四時歌

黃鳥鳴深林往來疾於織非無機杼聲其奈不成匹
湘筠織成箔瞽眼便相親漫將心附郎別有簾外人

蠟蛸網朱戶露葉藏暗螢與君幾日別忽地秋風生
起來不梳頭冒冷弄冰雪儂手原不寒郎心為誰熱

白紵春辭

小窗西畔月輪斜銅博山前散紫霞宴罷不知春夜促
醉馮紅裏看梅花

皇甫沖

楊柳詞

上林新柳弄晴暉柳上春來春又歸江南此日絮應盡
北地今來花未飛一自離家五經月夢裡垂楊別時折
春歸不逐梁間燕春去其如花上鶼人道京華別樣春
我獨逢春愁殺人陽和偏到宇文樹風力長吹庚亮塵
塵飛莽莽散白日禁柳宮花自顏色何事當年撫樹人
今日還來淚沾臆臆淚沾衣不得乾人生何似客中難
年華易逐東流去白髮羞將鏡裡看眼看白髮何能改

故園楊柳應猶在
婀娜長條拂地垂
莫使春光不相待

皇甫涍

寒夜曲

碧殿金風生綺紈
宮槐吹盡不留殘
沉沉月到苔陰上
添却簾櫳無數寒

空庭藹藹月凝霜
銀燭無光玉漏長
清漢數聲征雁度
夢回中夜憶遼陽

寒切雕窗透
錦茵殘更望
斷履綦塵空
閨不恨飛霜夜

總使春來益黠神

王衡低戶夜無聲月色籠寒照不明燈火漸催迎早歲
綠窗愁殺近啼鶯

皇甫汸

芳樹

芳樹九華邊春風一度妍飄香承輦路弄影向甘泉綴
葉紛千種濯枝幸萬年不作淮南桂空山徒棄捐

有所思

春風吹繡戶明月鑒羅幃同心阻芳訊千里悵清暉歌
絃塵屢積舞衣香漸微別有關情處梁間雙燕飛

擬中婦織流黃

金闈方永夜翠袖理殘機燈花斜落鏡月光低鑒幃寸
心共絲斷雙淚與梭揮作伴除蛩響驚眠惟雁飛織就
當窗素裁為遠道衣徒令芳訊達不及早旋歸

採蓮曲

雀舫疑杯渡虹橋似帶紫湖光湛處全無暑雲氣浮時

半有晴此時流水歌聲起此日採蓮殊未已帆迴櫓轉
逐橋斜樹裏溪邊是妾家翠裙怨殺風前葉紅粉嬌於
水上花花開花落獨含愁人去人來不斷遊玉岸醉霞
何惜晚瑤華零露易驚秋秋露蒹葭沒秋水芙蓉歇菱
鏡年年非故顏荷衣夜夜空明月

盤江詞

白澗流殘青嶂開雞公嶺帶夕陽來更聞江水盤千曲
何似愁腸日九迴

攢峯夾岸若雲稠下有飛泉一綫流春草深時多瘴癘
行人駐馬不堪愁

松風萬壑引盤渦聞唱公無此渡河漢將征西遺壘在
至今啼血染滄波

寒夜曲

風吹芳樹已凋殘却放清暉入畫闌莫道金闈常自煖
夜深翻似玉門寒

淡煙和月出霜林落盡寒花只素陰別有蘭缸凝彩焰

鏡臺斜倚照冰心

繡戶深沉半掩門玉窗愁對月黃昏閒垂翠帳何曾寐
熏盡金籠總不溫

年隨流水去傷神催入風光一度新何事蛾眉顰不展
玉顏無伴怕逢春

何良俊

白下春遊曲

城市總居圖畫裏江山鎮遼帝王宮秦人漫自誇韋曲

越客何須說剡中

即遣嬌歌和野禽更教紅袖拂青林自從謝傅東山後

傳得風流直至今

金大輿

白下春遊曲

江南春煖杏花多拾翠尋芳逐隊過滿地綠陰鋪徑轉

隔枝黃鳥近人歌

雙飛蛱蝶戀青莎逐隊流魚泛碧波共買杏花村裏酒

來聽桃葉渡頭歌

長干寺前花不稀淺紅深白映山扉樓頭載酒看花生
堤上行吟踏月歸

錦雲如砌宿鴛鴦

文彭

笠澤漁父詞

無利無名一老翁筆牀茶竈任西東陸魯望米南宮除

却先生便是儂

吳淞江上是儂家每到秋來愛荻花眼未足日初斜起

坐船頭看落霞

釣得鱸魚不賣錢船頭吹火趁新鮮樽有酒月將圓落

得今宵一醉眠

夜深結網一燈紅吹笛隣舟攬睡濃雪夜月雨晴風都

是漁家一醉中

張鳳翼

養蠶曲

曉露沾我襦採桑過南陌葉少不盈筐蠶飢妾行迫蠶
眠妾不眠絲成共夜織勞苦有如此方能成匹帛奈何
衣帛人剪裁不復惜

竹枝詞

妾從湘江歸君向湘江宿欲識淚痕多請看湘江竹

御選明詩卷十



總校官庶吉士臣侍朝
校對官檢討臣蕭九成
謄錄舉人臣傅瓊芳